

**MALONGI YA TATA PISEKOPO NA KITANU YA SANTU YA
LE 05/04/2012 NA CATHEDRALE SAINT KIZITO YA IDIOFA**

BATATA, BAMAMA, BAMPANGI BAKRISTU BATONDAMA, BENO YONSO BANA YA NZAMBI, MBOTE NA BENO ; MBOTE DIAKA, NA BENO YONSO NGEMBA.

Bampangi batondama,tuka mazono,dibundu mama na beto imene kuyantika bilumbu tatu yanene ya ke kotisa beto kibeni ye kimakulu na kwenda kuta nkinsi Pake (Triduum pascal).

Na bilumbu yai tatu, dibundu ikele kuzabisa beto na kusungimina maswekamu ya nene na yina ke tala lukwikilu na beto.

Mazono,na kiya ya santu,beto sungiminaka kilumbu ya yezu kugangaka kisakramento ya ukaristia ti ya kintumba,kidimbu ya yandi ikele kuyambudila beto sambu na kukaninaka yandi konso ntangu :« beno ta salaka yau na kusungiminaka mono »Lc 22,19.

Bubu na kitanu ya santu, dibundu ikele kuzola nde beto yonso kufidisa Yezu Kristu Ngulusi na beto ya ntoto mvimba na mampasi ya ta kunata yandi tii kuna lufwa na zulu ya kulunsi sambu na lutondo ya yandi vandaka na yo sambu na beto bantu.

Ye na kisabato ya santu, na mpimpa na yo, beto yonso ta yangalala sambu Kristu ata kununga lufwa ye ata kufutumuka.

Bampangi batondama,bubu yai dibundu ya mvimba kele kusungimina kaka ve mampasi ya Yezu ,kansi mpi ke vukana ti Kristu na mampasi na yandi sambu konso mukristu kusosa na kubakisa kifulu ti mfunu ya mampasi ya yandi lenda kumona na luzingu na yandi ya kimukristu awa na ntoto.

Yau yina na bisambu na beto ya bubu beto imene kuyantika ti nzila ya kulunsi sambu nde beto mpi kulanda malembe malembe nzila ya ngulusi na beto kulandaka tii kuna lufwa na yandi na zulu ya kulunsi.

Yezu imene sala mutindu yina sambu na lutondo ya yandi vandaka na yo sambu na beto bantu.

Nsangu ya mbote ya beto me katuka na kulanda imene kuzabisa beto mbote mbote na bunda, inki mutindu mambu yina imene kusalama.

Bambangi batondama,Nzambi ikele kusalaka ve mambu na kintulumukini,yandi kuyidikaka ntama ,na kuwakana ya ntama ,mambu yai ya beto imene kulanda na kuwakana ya mpa.

Na kangu dinkulu, Nzambi kusilaka na bana na yandi nde yandi ta tindila bo Ngulusi ; ye kaka na kuwakana yina ya ntama, yandi ke fula na kuzabisa bo nde nsadi na yandi fwete mona mpasi,bo fwete bula yandi, bo ta nata yandi tii kuna na mesa ya kimenga sambu na kufwa yandi ;ye yandi kele kwenda na lufwa nkatu kutuba ngogo,bonso mwana dimeme ya bo ke kwenda kufwa(Is 53,7).

Ye na mpasi yina, na mafingu yina yandi ikele kuvutula ata ngogo mosi ya mbi ve. Ye nsadi yina, mwana dimeme yina ya propheta IZAYA ikele kutubila na kuwakana ya ntama ikele YEZU KRISTU, Nganga Nzambi ya kieleka ya imene kukitambika kimakulu sambu na masumu ya ntonto mvimba (He 4,14).

Bampangi, na kutala mbote-mbote masonama ya santu ya bo imene kutangila beto na kilumbu ya bubu, beto lenda kubakisa nde, na luzingu na beto ya kimukristu, ikele na mampasi ya beto lenda kumona ti kuzingila na kati ya lutondo sambu na lukumu ya nzambi.

Tala kikuma ya mono pisekopo na beno ke zola kuzabisa beno ye kubambula beno mbundu na mambu yai tatu :

1⁰ (Ya ntete) Mampasi na kati ya luzingu na beto bantu awa na ntoto

2⁰ (Ya zole) DISONGIDILA ya kulunsi

3⁰ (Ya tatu) Mambu ya ikele kutadila ndolula.

1. Mampasi na kati ya luzingu na beto bantu.

Beto ikele kuzaba nde na ntoto yai ya beto ke zinga ikele na muntu ve ya ikele ndimaka to ya ikele kusingaka mampasi. Na mayele na beto bantu, beto ke sosaka kutunga banzo ya mbote, kukisansa na madia ti bankisi. Beto ke salaka yonso yina sambu nde luzingu na beto kuvanda mbote.

Na bunkufi, konso muntu, ya konso mpusu, ye na konso kisika, kele kuzolaka nde luzingu na yandi kuvanda mbote, yandi ke kuzolaka ve mampasi sambu mampasi ikele kunataka mbala mingi lufwa. Yina luzingu na beto awa na ntoto.

Kansi kana beto kutanga na masonama ya santu, beto ke mona mbala mingi nde Nzambi ikele kuzodila nde bantu na yandi kulutila na nzila ya mpasi sambu na kuzwa badienga , makabu ti mambote ya ke kukatuka na yandi.

Beto tala inki mpila bana ya Israël mene kumona mpasi na ntoto ya kuyuma, ya zelo-zelo na ntwala bo kukota na ntoto ya Nzambi silaka na bo.

Na mukanda ya Yonasi, ntotila ikele kuzabisa na bantu na yandi na kundima mampasi, kulala na zulu ya mfututu ya tiya, kukipesa mpasi sambu Nzambi kugulusa bo na masumu ya bo salaka. Yai ikele mpi dilongi mosi na kati ya malongi ya dibundu imene longa beto na ntangu ya Kareme : kuzaba kumona mpasi sambu na mambote ya bantu ya nkaka ye sambu na lugulusu na nge. *Savoir se sacrifier pour les autres et pour son propre salut.*

2. DISONGIDILA ya kulunsi sambu na beto bakristu

Bampangi na mono, Yezu yina ya beto, kumosi ti besi yuda yimbilaka ti mandalala: “Hozana, Hozana na mwana ya David” na lumingu ya ndala, ikele kaka yandi yai ya beto ke monisa nsoni bubu na kutuba: koma ye gonda yandi na kulunsi. Yandi ke ndima lufwa ya nsoni sambu na beto.

Malongi ya kitanu ya santu ikele kutuma beto mpi na kuyindula mpi na kulunsi ya Yezu kristu, ya ikele diaka ve kidimbu ya nsoni kansi kulunsi ya Yezu ikele kidimbu ya lugulusu sambu na beto bantu. Kulunsi ke gulusa beto, ke belula beto ye ke lolula beto na mampasi ya mutindu na mutindu.

3. NDOLULA

Na ntwala ya mafingu ye nku ya Bantu ya ntoto yai na Yezu ya kusalaka kaka mambote, Yezu ikele lolula bo (Père, pardonne-leur car ils ne savent pas ce qu'ils font ...). Yezu ikele kupesa beto mutindu yina mbandu ya mbote sambu nde beto mpi, na ntwala ya mampasi ti mbangika ya beto ikele kuzwa ye kuzingila na ntoto yai, beto kuvidisa ve kikesa, beto kukwamina ye beto kukangama na kulunsi na yandi. Beto kuzaba kulolula ya kieleka bayina ya beto ke bakaka bonso bambeni na beto; ye beto samba mpi sambu na bo na mpila nde Nzambi kubalula bantima na bo.

Na kusukisa bampangi bantondama, beto sosa kubakisa nde mampasi ya Yezu Kristu ti lufwa na yandi na zulu ya kulunsi ke zola songa na beto na kundima ti lukwikilu ye kivuvu yonso bambangika ya beto kulenda kuzwa sambu na mambote ya beto lenda sala na bampangi yankaka.

Yezu ikele kulombila na beto na kuvanda ti kikesa na ntwala mampasi, na kukangama na kulunsi na yandi ye na kuzaba kulolula ya kieleka bayina ke salaka beto mbi.

Beto ta samba ye ta tambika mampasi ya diocese na beto, ya mafamilia ti ya nsi na beto na kilumbu ya bubu na Kristu; beto ta samba mpi sambu na bayina yonso ya ikele kumona mpasi sambu na lukwikilu na bo, nde mama maria kusadisa bo; yandi ya kuzingilaka ye kufidisa mwana na yandi na mampasi na yandi tii kuna lufwa na zulu ya kulunsi, yandi kuvandila bo mpi dikunzi ya lenda baka mpasi na bo sambu na kufidisa yo tii na Kristu.

Na beto yonso ngemba !